




本館內藏

明倫彙編



序

聲之爲道大矣哉雷出地奮而  
蟄虫俱醒天地之以聲感物也  
最捷五音六律交相爲用雅樂  
入耳而善心生鄭聲入耳而淫  
心滋帝王之以聲化人也最淡





詩言志律和聲彈琴鼓歌而性情是化吾儒之以聲教人也最切南閻浮提以音聲作佛事而慈航大士耳根圓通得選第一釋氏之以聲入道也爲最真聲之爲道大矣哉故學者讀書稽

古得于目者每易忽得于耳者恒不忌本戲劇也事屬烏有而當場演唱愚夫愚婦遂以爲真而終身記憶本實事也或政關國體而耳不常聞士子儒生遂至相忘而心不能識乃用修楊



子聚古今人物而歌彈于一日  
之間使人油然以解質純許子  
取前朝事畧而演唱于頃刻之  
內使人了然盡知遇雖霄壤而  
以聲音感人則無異故不特爲  
揚子之功臣而勝國之鼓吹也

不特爲褒貶之取資而懲勸之  
微權也以之補助化機宣揚人  
物詎曰絃歌之化無關政教也  
哉書成是爲序

皆

康熙乙丑冬日石楷臨初氏題

于頤志堂



序

古今直一戲耳茫茫宇宙勢若奕棋攘攘勞生還同蝶夢  
無論開闢以來至漢唐宋元不知幾帝幾王幾將相矣百  
年瞬息終歸消歇滄海桑田誰測變更兩丸日月送却無  
數聖哲昏庸奸邪忠烈何貴何賤何賢何愚同爲白骨長  
臥黃泉興言及此達人志士有無限興亡之感卽如有明  
一代無端而崛起與淮右布衣竟登九五無端而謀犯金川  
龍孫遠遁滇南無端而駕陷土木竟使萬乘蒙塵無端而復  
辟南宮能使衣冠再整以至貂璫擅政毒流紳士兄終弟  
及發迹籓封一月聖明抱恨于紅丸七載弄權尸居于黼



座陝右一呼旌旗遍海內神京偶犯曆數盡煤山三百年  
中幾許變遷黃梁未熟一夢華胥大地乾坤直從邯鄲道  
上看破先朝楊子升菴以曠世逸才因議大禮遠謫滇南  
一腔悲憤無由自見上下數千百年間譜作彈詞遠溯羲  
皇近迄宋元如怨如慕如泣如訴以視屈子離騷殆後先  
一轍者乎而有明一代猶未之及吾友許子拙菴幼負異  
才數奇不偶因作出世想偶從面壁之餘續成楊子未竟  
之緒感慨淋漓直欲擊碎唾壺讀之數過百端交集今而  
後直欲以大地作梨園長安名宦爲後房子弟禽魚花木  
當作管絃喜怒哀樂權爲宮譜許子登場余且搥起漁陽

之鼓一唱三嘆直令三千大衆一齊颯破浮生不待鑼鼓  
聲消歇方悟先前熱鬧皆屬夢幻泡影豈不快哉前乎此  
後乎此皆作一戲視之可也回視屈子離騷反多一懷石  
沉江之憾云

鹽官弟張賡齡秋寧氏拜題

序

蓋聞採風入奏知民俗之貞淫覽古謳吟見前朝之得失  
聲音之道與政相通寤寐而歌舒情最切聚古今于掌握  
須藉編年現人物于當前尤資喉吻况乎進戒周臣每師  
殷鑒至言賈子借喻先秦此彈詞之不可不續而明事之  
尤當絃歌者也吾表兄質翁許子生雖貧窶裔出簪纓世  
德清操家無儲積年方弱冠爲外家奔計跋涉瀟湘驅馳  
江漢洞庭七渡幾爲屈子之賓衡嶽五迴心企祖師之印  
歸而赤手不涉世緣物外超然齋居一室著述頗多無心  
自表尼山之疏水猶且常虛陋巷之簞瓢未聞日給面壁



真傳適與性宜孔顏樂處不謀而合乃與吾家昆季中表  
情殷芸窓共事偶覽楊子餘編遂從定中起舞爰取勝國  
遺聞續譜當時絃索誅奸諛于既死能使鬼泣神號發潛  
德之幽光可致穿雲裂石高山流水豈乏知音白雪陽春  
終難湮沒敬付梓人以公同志將見黃鸝嚙柳和玉腕以  
悠颺鐵騎嘶風助劍光之激烈使忠義聞之而色壯奸邪  
聞之而胆寒方外閤人情空四海華胥夢客喚醒單詞實  
有禪于人寰自不同于月露轉使聞之恍見昔年興廢之  
由皇華遇焉目睹今日絃歌之化開人懷抱詎我自思節  
性陶情庶幾小補云

崑

康熙丙寅上元同學表弟石廷煜綱菴氏拜題



小引

或曰彈詞何爲而續也曰知作者之意卽知續者之意矣  
昔用修楊子以元輔子而擢制策首其遇隆矣因諫大禮  
而遠謫滇南終身不得復用於是上下古今夢幻身世乃  
作廿一史彈詞是猶屈子之放逐江潭而作離騷也離騷  
失之愚彈詞失之放愚則誠放則達惟誠而後可生達則  
彈詞之與離騷信哉可企駕而齊驅也今子旣不得君復  
無遠適乃爲續之何與乎離騷耶昔太史公曰離騷者猶  
離憂也余無二子之才而憂則有之童年失怙恃弱齡遭  
亂亾年已強仕不遇知音親族鄙棄骨肉相殘爨煙常虛



時同寒食 雙親未塋後嗣莫繼呼天痛悼無可控愬乃  
作續彈詞亦猶續離騷之意也然二子學博才弘義深遠  
矣

丙寅春王拙菴識

續彈詞卷上

鴛水許文炳質純編續

同學表第石

廷煜網菴  
廷煥允菴

校正

昔楊用修作史畧詞話一書譜之絃索後人名之曰廿一  
史彈詞膾炙人口半俚半雅雅俗共賞兼文兼武文武並  
欣分爲十段又名十段錦但明代事迹尙未有續余以鄙  
樸庸不自抱續貂之愧謹將明代事畧分爲五段依韻續  
之

第一段 說明朝太祖建文 西江月

天地何年有盡生民每世常增前人事迹後人評往往來



來無定 秋月春花可印譚玄說妙難憑今時不是往時  
人覆雨翻雲誰信 詩曰

覆雨翻雲閱世情悲歌談笑一般聲書生抱志幽窓下  
執筆挑燈續舊聞

執筆挑燈總是空閑非閑是夢魂中回思少壯青雲志  
化作中年白髮翁閱歷親朋俱不見浮沉世態杳無踪  
且償夙昔詩書債好對春風信息通

春風簇起花如錦秋色吹殘落葉聲行望江濱流水逝  
坐看山頂度浮雲白駒過隙難留駕紅日飛空不住輪  
塵世茫茫無有定幽懷落落自閑情寫將奸佞增愁憤

說到英雄忽袒襟群怨如逢千古士與觀不異一時人  
奇志盡從貧賤老雄心暫借史書鳴昔年才子抒懷抱  
今日愚夫緝見聞長事剪裁成短句漫研故紙續新文  
佳人緩按冰絃和玉指新聲奏古今

明朝太祖高皇帝姓朱名元璋父名世珍母陳氏夢神授  
藥一丸吞之而生帝于濠州每夜紅光燭天時人稱爲朱  
氏火年十六父母兄弟俱喪托身皇覺寺時元末大亂韓  
山童倡亂其子林兒稱小明王據亳州徐壽輝據蘄黃張  
士誠據蘇松陳友諒據江西湖廣方國珍據浙明玉珍據  
四川郭子興起兵濠上太祖投其部掃蕩群雄得了元朝



天下改元洪武在位三十一年太子懿文早卒太孫名允  
攸年號建文立四年太祖第四子燕棣入篡是爲文皇帝  
先將太祖至建文三十五年行事畧爲彈詞一段頌述先  
朝

明太祖產濠州匹夫奮起

父世珍母陳氏四子親生

夢神藥母吞之因而誕帝

光燭天朱氏火每夜如焚

年十七遭時疫親兄俱喪

無儔侶誰依托皇覺棲身

四海變元天下紛紛割據

韓山童裹紅巾倡亂興兵

應童謠挑黃河石人隻眼

小明王都亳州僭號稱尊

徐壽輝據蘄黃天完國號

明玉珍方國珍川浙爭名

張士誠號吳王蘇松立國 陳友諒擅江西雄冠諸軍  
滁陽王郭子興起兵濠上 明太祖投其部藉勢相成  
妻養女掌兵權威名日著 畧定遠取永州基業方新  
徐元帥暨湯和率先歸附 馮國用與其弟領部投誠  
問大計定金陵龍蟠虎踞 帝王都真天險歷世相承  
秦從龍洛陽人任以帷幄 劉伯溫才王佐挾策扶君  
籌進取攻上流鄱陽大戰 被圍急服龍袍代歿韓成  
難星過急更舟天生真主 陳友諒貫流矢喪却殘生  
張士誠自守虜真無大計 城破日被囚去自縊金陵  
周顛仙告太平其言方驗 烈火煨拋江水遁去無形



卽帝位在金陵天清氣朗  
香靄凝中星露景象昇平  
立馬氏爲皇后母儀天下  
遇親征必戒殺德勝長孫  
命徐達統雄兵元都直抵  
元順帝率妃嬪逃出都城  
徐將軍入其城市不易肆  
安士女封府庫底定燕京  
不貪財不好色真稱德將  
不血刃不擄掠無愧皇明  
論將功破采石遇春居首  
察天文明大計誠意爲能  
廖永忠傅友德征川伐夏  
昇小舟過峻嶺襲破明昇  
開雲南沐國公永鎮其地  
平沙漠大一統南北無塵  
定律令任伯溫兩端示戒  
立兵制定衛軍權總朝廷  
明音律奏樂章冷謙獨步  
昭成功修文德四海和平

功臣廟廿一人中山第一

鄭氏子十世居婦言不聽

謫危素旌余闕尊崇忠義

惟庸反始追思仍還基爵

選高僧輔親王英君遺誦

國大明年洪武天開聖德

三十年在帝位仁民愛物

皇太子號懿文英年早喪

建文帝立四年諸王僭妄

黃子澄借齊泰欲平藩國

封公侯廕伯爵三十餘人

宋學士強三觴聖主弘恩

信惟庸疎誠意自累聰明

取其書廕其子方釋疑情

僧道行往燕藩篡奪機萌

無一民鮮尺土創立乾坤

七十載享天祿恭儉精勤

太孫立改年號又復稱文

據親藩藐天子叔父憑凌

周王幽代王廢騷動懿親



燕王棣最雄強威名大震 當酷暑向火爐搖首欺君  
方孝孺職教授名爲侍講 更律令議官制粉飾成平  
熒惑見守心星北方兵變 程濟言真先見反作囚人  
袁柳莊相君王西方害氣 宜防備西邊賊莫恃寬仁  
奈道行啓燕王潛窺奇術 混軍中入酒肆一見稱臣  
憶昔日辨宰相嵩山佛寺 到今朝識真主酒市紅塵  
燕兵反假名稱托詞靖難 效周公輔孺子寇犯京城  
赦程濟命景隆率軍北伐 李九江今趙括兵敗無成  
掠濟陽王教諭升堂伐鼓 聚諸生相向哭觸灰明倫  
遇鐵鉉守濟南堪稱勁敵 詐投降墮鐵版屢敗燕兵

姚知府謁錢芹能談時務 守禦策入勤王此日分明  
李景隆貪富貴開門迎附 卒龔詡明大義撞灰懷貞  
高皇帝授密匣時危方啓 得度牒無他計削髮爲僧  
宮中火御溝逃建文出走 莖假尸天子禮不去追尋  
建文皇守成君寬仁慈恕 天不幸遭永樂篡奪乾坤  
偕程濟入川閩雲遊兩廣 宣德朝稱老佛歸沒宮廷  
方孝孺罵燕王哀聲徹殿 暴妻孥夷十族不變忠心  
景清朝大紅袍懷兵欲刺 灰皮囊忽索斷犯駕懷驚  
成祖皇謀佔了姪兒天下 殺忠臣辱婦女不似人君  
建文子方二歲高墻幽閉 削年號訪躡謁密察潛形



用道行佐龍興賜名廣孝 榮國公錫美女不近其身  
不蓄髮不娶妻仍居佛寺 也虧著大賢姊傲戒成人  
運計謀姚廣孝比肩誠意 行篡逆莽和尚擾亂乾坤  
親骨肉自相殘天倫不顧 一家兒下犯上滅却君臣  
造非刑殺忠良心何慘毒 發教坊克樂妓國體何存  
到後來遭末運書獄滿世 天報應無一箇忠義才能  
殺運未除雖定數 叔姪干戈太不仁  
宮內火冲霄漢江邊殺氣氤氳無端骨肉動三軍殘害忠  
良堪恨 一派江流滾滾千層波浪茫茫北邙青塚有何  
分爲帝爲王俱盡

當年出口驚人句

日照龍鱗萬點金

第二段 說永樂以下八君 臨江仙

閱盡乾坤無數景何曾留得英雄爭名奪利總成空  
閨庭春草綠野渡落花紅 無事老人松下坐但知明月清風  
樵夫牧豎罕相逢興亡多變態不到白雲中 詩曰  
雲聚雲開無古今誰人事業不消沉若還省得回頭看  
流水高山一操琴

琴聲日在長空裏何必絲桐指上分知己相逢能有幾  
開懷獨自詠奇文是非紙上休縈抱窮達隨時不動神  
若到水窮山盡處忽然別透一乾坤



乾坤有恨家何在江漢無情水自流建文皇帝真豪傑  
露出神通概世休老佛自稱誠不愧魂羈沙漠反添愁  
宮裏少年多沒盡歸來不覺雪盈頭老奴猶憶當年事  
說到傷心淚不收長樂鐘聲猶宛在舊時燕子幾曾留  
世事無憑俱若此不如對酒且消憂消憂好把新詞詠  
尋樂休將名利求求利竟爲奔渴鹿圖名一似享犧牛  
朝來彈指興亾話一霎千秋與萬秋

成祖文皇帝既篡姪兒建文天位改元永樂在位廿二年  
子仁宗昭皇帝名高熾年號洪熙在位一年子宣宗章皇  
帝名瞻基年號宣德在位十年子英宗睿皇帝名新鎮年

號正統在位十四年陷于土木諸臣立弟郕王祈鈺改元  
景泰是爲景皇帝在位七年正統復位改元天順在位八  
年子憲宗純皇帝名見深年號成化在位十三年子孝宗  
敬皇帝名祐堂年號弘治在位十八年子武宗毅皇帝名  
厚照年號正德在位十六年無子從弟與獻王子入承大  
統是爲世宗自永樂至武宗一百九年事迹相續清彈聊  
供雅聽

文皇帝既受命遷都燕邸 處北京控中華奕世相因  
却玉碗謝方書勵精圖治 獲騶虞貢白象瑞應何稱  
逞雄心肆餘威兩征北敵 到頭來不及返塞外殂崩



享榮華竊天位魂流沙漠  
反不如建文皇歸沒宮寢  
子洪熙卽帝位三楊夾輔  
楊士奇尤倚任輔弼良臣  
建文黨大赦除真爲幹蠱  
救民飢如救火厚德深仁  
被纜言處危疑監國十載  
行仁政施膏澤止一年春  
宣德朝漢王反親宗乃父  
天子將出不意火化爲塵  
猗蘭操招隱詩求賢若渴  
敦本枝威北寇果毅英明  
臨天下方十載皇恩已溥  
幼太子年九歲卽位爲君  
寵王振擅主權鴟張威福  
邀邊功北番寇挾帝親征  
熒惑星入南斗徐理知變  
正統皇陷土木擁入番營  
賴于謙立郟王社稷有主  
殺馬順族王振安慰人心

選勇將練精兵敵知有備  
石將軍于少保捍蔽長城  
景泰立正統棄北人計阻  
刺客來大奔遠刃不能侵  
也先妹獻上皇禮無野合  
待朕歸將禮聘北敵知欽  
遣楊善迎上皇虛詞賺敵  
還天子名萬世敵衆歡欣  
中秋日正統歸京師雀躍  
無面目重登極兄弟相迎  
不知足景泰帝終貪天位  
送上皇南宮住禁錮傷情  
廢見溪立見濟天不祐助  
太子率猶不悟炮烙同綸  
上不豫儲未定有真定計  
破南宮復大位天順重臨  
于少保大功勞乾坤立挽  
搆讒言遭誣謗屈殺無伸  
石享反歿獄中謙心始白  
曹吉祥伏誅歿天理方明



建庶人赦幽囚出居鳳邸 聽婚娶無拘束克體天心  
復帝位又八年民安物阜 履憂患能修德也算賢君  
成化立孝兩宮李賢輔導 程萬里復河套創議難行  
赦于冕回戎籍父寃得洩 憫無辜復其秩庶慰忠靈  
寵汪直賴阿丑滑稽悟主 直寵衰尋削職大快民心  
發帑金建佛寺諍臣下獄 塑尙書糊閣老豈象朝廷  
弘治時因星變直言鄒智 退萬安進王恕從諫如神  
任謝遷信大夏都俞氣象 李夢陽敢直諫曲體其情  
正德君真無道尊崇六黨 寵劉瑾擅朝權謫死忠臣  
藍廷玉金劉烈稱王川陝 安化王謀反叛誅瑾爲名

賴張永因兵起歸殃劉瑾 坐逆謀伏誅死奸黨纒平  
信江彬病豹房稱爲家裏 寵昂妹善騎射馬上番音  
至大同獵黃花盤遊無度 議北巡命草勅威武將軍  
梁儲諫善回天免冠執奏 至榆林六閱月又欲南巡  
上泰山下徐楊願遊江漢 效秦皇方周穆矢志荒淫  
寧王反破九江阻兵安慶 江彬計請親征遂幸南京  
王守仁伍文定直趣巢穴 破南昌襲寧府一火而焚  
運奇計執宸濠囚歸行在 至通州令自盡燔化揚塵  
請回鑾阻遨遊梁儲蔣冕 始還京纔返駕不月而崩  
嘆遊龍難傳嗣兄終弟及 興獻子入繼統嗣守神靈



雖然是一家人原無更改  
也算做小與廢變動天心  
與一枝廢一枝移花接木  
東邊消西邊長斷續分明

金枝玉葉皆龍種  
九五高飛又一人

得失與亾有命榮枯斷續無乖  
樽前有酒且開懷管甚桑  
田滄海 幾頁青箱殘史堪將  
白髮消埋離離禾黍滿塵  
埃又動一番感慨

一枕夢魂酣富貴  
醒來依舊是清貧

續彈詞卷下

鴛水許文炳質純編續  
同學表弟石  
廷煜網菴  
校正

第三段 說嘉靖以下四君 西江月

倏忽風雲變態往來日月常明  
百年事業細追尋一代軋  
坤無定 暮鼓晨鐘隱隱秋鴻  
春燕頻頻朝來漫數落花  
情紅杏枝頭已盡 詩曰

紅杏枝頭別有春紛紛蜂蝶鬧  
花晨東皇正欲常爲主  
落葉西風掃白蘋  
白蘋紅杏兩無情。按節長歌頌  
古人俗眼豈知天下士



竒懷且自混。凡塵馬嘶古岸行人過。變秀城空野雉鳴。  
幾度夕陽垂。返照寒鴉一片落孤雲。

孤雲猶帶當年色。世事於今更不同。忠義每遺千載恨。  
奸邪已向一時空。好花偏值風吹樹。明鏡常爲塵土蒙。  
紅粉未消青塚怨。紫袍纔脫白楊隆。民安物阜真難遇。  
主聖臣良豈易逢。今日身隨仙仗列。明朝迹逐野鷗叢。  
冲寒筆飽三冬雪。不寢神驚五夜鐘。堪悼盛筵隨客散。  
忽傷殘燭霎時終。人生爲甚忙忙老。抱志何由寂寂窮。  
走遍天涯無可覓。歸來一笑向春風。

世宗肅皇帝名厚。熈興獻王子。因武宗無子。入承大統。年

號嘉靖。在位四十五年。子穆宗莊皇帝名戴。屋年號隆慶。  
在位六年。子神宗顯皇帝名翊鈞。年號萬曆。在位四十七  
年。子光宗貞皇帝名常洛。年號泰昌。在位僅月。子熹宗愍  
皇帝名由校。年號天啟。在位七年。任用太監魏忠賢。毒流  
紳士。弒害中宮。自斬其嗣。傳位於弟信王。由檢年號崇禎。  
自崇禎至永曆。敗亂喪亡。另爲一段。今將嘉靖至天啟行  
事畧爲傳述。以奉知音。

嘉靖帝楚藩王武宗從弟。請來京。因瑞應。繼統相承。  
議大禮。本生親。反稱叔父。尊孝宗爲皇考。不近人情。  
聖母來用。妃儀子難。臣母張璉。議真允。當衆毀飛騰。



辭太后願歸藩終身孝養 衆群臣俱惶怖勉強稱尊  
謫楊慎貶羅倫情雖過當 尊皇考稱聖母義重天倫  
有余珊做魏徵上言十漸 議守仁爲異學桂萼心盲  
尊孔子爲帝師改除王號 張璁論超千古豈曰非能  
慧星見太白形災殃已兆 熒惑侵入南斗不是無因  
曹妃宮婢楊英組經帝項 張金蓮告太母救駕誅英  
南巡狩火行宮陸炳排撻 負帝身超烈焰四月還京  
曾說斬仇鸞與嚴嵩悞國 殺大臣棄河套番騎侵凌  
沈經歷劾嚴嵩殺身不顧 楊繼盛疏十罪觸怒奸臣  
賊汪直引倭夷寇屠蘓浙 胡宗憲誘投降誅死其身

南倭寇北番侵兵端擾攘 好祥瑞求仙術豈是英明  
師仲文修齋醮剛峯直諫 王金進長生藥火炎身崩  
享天祿受尊榮四十五載 治之終亂之始未筭成平  
子隆慶嗣天位差能幹蠱 赦海瑞誅方士大快人心  
陝西男名李良忽變爲婦 栗生桃泉化酒不足爲禎  
李成梁破北兵稍寧邊患 六年君天命短遽爾還昇  
上不豫幼東宮年方十歲 高閣老張居正顧命元臣  
萬曆皇初卽位高張輔政 張居正謀高拱欲擅威名  
無鬚男闖軋清不知何自 陰囑付誣高老遣刺皇身  
吏部言科臣救錦衣會鞠 電霧飛風沙走寃獄方明



張居正遭父喪不能守制 吳中行沈思孝彈劾忘親  
王錫爵勸江陵曲爲慰解 劓頸行爾殺我盛怒難平  
論相業進規箴名臣無媿 攬權勢嫉同列見誚儒林  
潘季馴築河堤八百餘里 黃河安淮揚莫陵寢無驚  
開越河許應達高寶永利 屯船塢公創立漕艘安寧  
起海瑞在南京僉都御史 杖其屬群奉法遊讌無聞  
民傳頌士謳歌復生包老 掌僉都九個月一旦仙行  
人頭鳥集秀水其年大旱 大風霾驚畿甸惑亂愚民  
酋孛拜寇西邊破城殺將 李如松用水攻寧夏方平  
河南饑人相食堪爲長嘆 楊東明進饑圖鄭俠重生

王錫爵性忠誠勤勤懇懇 再三言連疏奏請立儲君  
有狂客號飛仙一呼萬里 葉永盛驅出境倏忽無形  
陝西有牛產犢人頭人面 山東地忽裂出龍鬪奇聞  
神宗處父子間真爲慈孝 賊張差操挺擊異事堪驚  
不誅連誰主使危疑善處 息群言止妄論父子全恩  
鼠萬餘渡江南食苗害稼 廣寧婦產一子二角猴形  
東方兵建國號大清立帝 正陽門河水變赤色驚人  
楊鎬率四路兵分行北伐 杜松逃劉挺死血汚忠魂  
熊廷弼賜尙方刻期援勦 單車赴圖恢復國爾忘身  
神宗帝坐龍床四十七載 內饑荒外邊患國事靡寧



子嗣位號泰昌難周期月 五星闕三日出天變流行  
徐光啟練京兵操持內衛 犒九邊金百萬想望升平  
天不佑聖明君享年何促 李可灼進紅丸夜盡而崩  
李選侍想垂簾挾持皇子 賴楊漣排闥入請見新君  
宦王安給選侍抱持以出 衆群臣呼萬歲扶掖而行  
文華殿覲朝臣莫安天位 催選侍急移宮不得留停  
合挺擊共紅丸移宮三案 或論功或定罪各當其情  
子由校號天啟冲年卽位 日生暈遼陽陷禍亂機萌  
寵魏監尊客氏紛紛昏暴 戮忠臣誅義士擾擾乾坤  
王安誅楊漣謫功臣負屈 殺裕妃弒張后闢毒何深

黑青見擾民間妖災豫兆 委鬼立茄花紅謠唱先徵  
演內操練甲兵皇嗣震死 試巨炮驚御座幾弒其君  
疏大罪二十四楊漣抗旨 葉向高進遜語亦不留情  
魏太監殺忠良一時俱盡 毆緹騎五義士千載揚名  
熊廷弼抱邊才慷慨大志 姚崇文王化貞白面書生  
兩番出兩番遠俱遭喪失 一般誅一般議獨負冤沉  
爵元凶建祠堂不成世界 廕群奸歌功德豈似朝廷  
幸臨終召信王得人付托 七年間元氣盡難復成平  
忠臣抱恨歸泉壤 化作啼鵲帶血飛  
決勝疆場鬼泣運籌帷幄神驚功名圖得上麒麟轉眼已



成灰燼 勢去英雄抱屈時  
來豪傑揚名生逢末劫苦難  
伸惡夢沉沉未醒

富貴反添生死障

不如柳底聽黃鸝

第四段 說崇禎皇帝 西江月

禮樂雍容常少干戈擾攘恒多天生羅刹苦相磨何日收  
場結果 北海鵬飛已遠南山猶自張羅若還不省箇中  
符展轉輪迴真苦 詩曰

輪迴却似水中漚起没何常無盡頭偏怪世人生業重  
但將皮骨結恩仇

皮骨何曾堪不朽恩仇空結漫天昏川盈溝滿征夫血

野哭城愁怨女魂殺氣冲霄迷帝闕陣雲遠樹失孤村  
民生此世真難度悵望天涯無地存

悵望天涯增感慨研求故典遺微畏金陵王氣消全盡  
玉墀班聯境已空聚散浮雲常漠漠往來流水日溶溶  
旌旗描畫當今號簫鼓傳聞猶故宮黃土塚邊埋壯士  
白雲壘上哭英雄銅駝千載淪荒草金屋當年貯美容  
九陌紅塵歸北海萬方臣妾付東風前朝事迹還須續  
奕世傳言各不同亡主夢沉冰忽解興王濟世日初紅  
我今細把興亡譜盡付華山一枕中

信王由檢受天啟之傳卽帝位年號崇禎在位十七年派



賊李自成破京城而自縊於煤山

國朝謚懷宗端皇帝江南謚威宗烈皇帝今將喪亡事故細

細伸說一番聊作雍門之操

崇禎帝振君權繼兄而立戮魏黨誅客氏大快輿情

旌忠直赦誣賍欲回天意水旱頻饑荒徧滅死生靈

十七年亂紛紛一言難盡徧中原多盜賊處處流氛

元年春大清國屯師河上袁崇煥督遼薊移駐關門

毛文龍屯皮島雄兵制敵建州帥遣固山諸島輸誠

召崇煥問邊關何時可定五年期無成筭妄對朝廷

毛將軍本忠良反憂跋扈戮龍錫與崇煥定計而行

至隻島假溫存文龍進謁伏甲兵矯聖旨屈殺忠臣

寧遠軍因糧乏譁囚巡撫白水盜名王二劫掠蒲城

二年冬大清兵破關直入奮熊罷逞貔虎攻薄都門

各巡撫率精兵勤王入衛表督師統大隊城外遽巡

辛亥日召崇煥平臺問罪殺文龍詰其故措對無聲

遣太監分慰諭遼東將士命蒲桂專節制總理援兵

三年春大風霾京師晝晦清兵入永平破內應傷春

劉之綸中流矢全軍覆沒左應選率諸部追卻清軍

海峰石自相移五十餘步熒惑星入南斗威鳴聲鳴

西洋人湯若望供事曆局召其徒羅雅谷同察天文



小紅狼掠地虎延綏就撫

艾都司穆感賊勢方來求款

曹文詔敗賊軍克平河曲

紫金梁聚其黨三十六路

霍夫人守寶莊挺身殺賊

孔友德陷登萊文龍牙將

臨穎縣金瓦飛瓦全金碎

鑽天哨開山斧永寧獨據

陳奇瑜七千人潛師突入

李自成至漢中被圍奇瑜

一丈青龍江水淫掠相仍

楊巡撫准養寇患百姓吞聲

賀人龍勞降寇伏斬其人

闖榻天活地草混世魔名

夫人城能全眾不愧其稱

因反叛勢窮感航海投清

西安城天雨穀黑色長形

阻山險臨黃河負固難平

出不虞攻無備卵破巢焚

勢大窘自降伏殺一孤豚

這機會失却了悞遵撫局

賊先鋒名高傑來投乞撫

洪承疇總三邊爵居司馬

有賊帥自稱呼古元皇帝

孫傳廷擒闖王獻俘闕下

十二年楊嗣昌督師勦賊

垂撫馭失將心王師敗績

福王殺楚王沉嗣昌難免

周延儒送清兵從容出塞

孫督師振威名身經百戰

到後來禍難遏流毒神京

賀人龍率以戰能卻派氛

破賊兵多智勇也筭能人

陷鳳陽燒陵寢罪惡難聞

秦翼明敗李賊潰去麻城

晏平臺手三爵受命南征

賀人龍左良玉失印懷嗔

襄王死周王失自縊於軍

傳宗龍食驢馬殺賊酸辛

時不利沒於軍無負君恩

張銓妻夫歿于官京師



續通志  
八  
悞殺了賀風子賊兵相慶 破關中如拾芥餘子何能  
江防道許文岐斬黃鎮守 身血戰勢難支罵賊亡生  
張獻忠破荆襄誅屠湖廣 李自成由川陝直取三秦  
羅汝才多智畧賊稱曹操 棄獻忠歸李闖到底相吞  
初不過志劫掠毒流海內 到頭來勢已大漸結人心  
有諸生名李巖勸其賑濟 牛金星宋獻策輔賊成形  
十七年正月朔風從軋起 主暴兵來破國凶兆先徵  
李建泰受節鉞率師禦敵 國勢去大厦傾一木難撐  
崇禎帝儘英明躬崇節儉 諸宰輔無計策盡是亡臣  
十七載痛憂煎辛勤惕慮 三百年挨不到喪國殘身

賊兵至殺后妃煤山自縊 襄城伯殞梓宮自殺成仁  
費宮人年十六親誅賊帥 衆大臣受拷掠忍耻偷生  
吳三桂走清朝乞師勦賊 齊軍威伸誓約不顧其親  
一片石李自成愴忙戰敗 十八日逃歸去滅影亡形  
盜賊何曾成事業 殺害生靈滿地腥

世界不成世界光陰難過光陰落花流水杳無情好向深  
山禪定 雨過塵開石縈風吹雲散天青幾番搖曳柳條  
新難動一枝松影

好傾北海汪洋水

洗淨乾坤慶太平

第五段 說弘光隆武永曆三君 定風波



歷徧中原逐鹿場張弓挾馬甚飛揚息足茅廬真憊懶瀟  
散漫將今古訴興亡 夢裏憂愁歡樂境醒來方信是荒  
唐看到此中無着處得趣紅爐烈燄自然涼 詩曰  
涼風蕭蕭雨花流春去秋來何日休午夜聞鐘常起坐  
月明如舊照床頭  
牀頭光徹顯鬚眉昏曉無分不自知鶴上九霄鳴最遠  
驥衝千里氣長嘶浮雲捲去黃金印波浪翻來錦繡旗  
百姓死亡鷄犬盡風流宰相下龍梯  
龍梯鳳閣居非久遺臭如今姿品論論到奸庸堪髮指  
話歸義胆最傷心傷心往事空長嘆放下當前沒片雲

長江一片蘆花舞燕子磯邊落日沉乾坤好景原常在  
點綴山川宇宙新無端幻出蛟龍影雨驟波翻阻世人  
須臾雨過波恬靜依舊楊帆趙客程縱觀遠徑斜楊下  
釣叟垂釣俟錦鱗錦鱗獲得消佳釀痛飲高歌且快情  
若還不解開懷抱金闕瓊臺未稱心

崇禎皇帝既死社稷馬士英等立福王由松于南京年號  
弘光在位半年鄭芝龍立唐王于福建年號隆武在位一  
年丁魁楚瞿式耜等立桂王之子由柳于肇慶府年號永  
曆在位十五年三君俱被執無謚今將弘光以後亂亡景  
像畧訴一回以代花奴之孽



史可法馬士英南京立帝 擁弘光剛半載暴亂荒淫  
患難妻幽獄底於心何忍 選皇后點秀女閭巷紛紛  
用奸人阮大鍼復仇報怨 真太子假誣做王姓之明  
長江上亂愴惶兵亡將死 深宮中縱淫毒串戲陶情  
戰清兵史閣部揚州殉節 背君父馬士英悞國逃生  
將母親巧稱呼弘光太后 大元寶攜載去笑殺強人  
到頭來難躲避一刀兩段 反不如做忠臣青史揚名  
群小人盡散去昏君出走 黃得功爲朝廷刎死江心  
左良玉下南京九江身死 將田雄識天命獻主投誠  
魯監國據會稽兵微將寡 一家中不合力那得功成

鄭芝龍駐閩中推尊隆武 貝勒王擁兵至誘取歸清  
自家立自家棄始終反覆 半明朝半清朝無地存身  
隆武君晒龍衣清兵追及 鄭國姓流落做海外孤臣  
丁魁楚瞿式耜協推永曆 何騰蛟復長沙陣上亡身  
李定國孫可望兩相夾輔 小朝廷懷嫌寡二虎相爭  
孫可望叛孤君投誠歸命 封義王享富貴快樂娛情  
李定國力不支退居雲貴 地愈小勢愈弱孤掌難鳴  
洪承疇領雄兵長沙入取 吳三桂逼漢中兩路來侵  
賂水西求假道潛師深入 破雲南攻交趾明統難存  
緬甸王生獻出孤君永曆 吳三桂結果了故主殘生



新滿官親情形懷悲洒淚 舊明臣行弑逆殘忍成心  
十五載苦相熬危疆辱主 萬軍中生勒做屈死冤魂  
太清朝平南北皇輿一統 體天心育黎庶萬載千春  
想當初宋太祖怎生英武 起淮楊統豪傑打就乾坤  
永樂帝逞威風兩番北伐 到正統幾變做南宋情形  
賴于謙竭精忠挽回天意 立景泰阻敵計天順還京  
至正德肆遊畋荒淫絕嗣 嘉靖皇入繼統不筭英明  
傳天啟寵魏監毒流宇內 崇禎皇遭厄運竟做亡君  
論歷年雖不及漢唐之數 詳國勢真遠過晉宋零丁  
風化正道學明閨門雍肅 后妃賢宮壺謹歷代相承

統前後捻筭來一十九主 共年數幾三百未滿其稱  
三百載瞬息間草頭微露 十九主一霎時風捲浮雲  
有聖主有昏君編成話柄 或忠貞或奸佞紙上遺名  
一朝興一朝廢逝同流水 幾人王幾人帝恍似飛塵  
奪乾坤主世界猶如夢幻 爭功名謀家計泡影何憑  
求成仙求成佛俱爲妄想 不憂名不憂利卽是修行  
把自己細思量有何定據 將他人來返照孰可留停  
忽然少忽然老鏡中花影 忽然生忽然死水上浮萍  
何須計何須謀千年事業 且回光且回照自己精靈  
有一朝續一朝重重疊疊 增一代編一代世世生生



要殊非混沌了方纔歇手

若還是重開闢更有奇聞

古今揔屬三春夢

天地渾如一局棋

四序無心常往江山有迹留名細思此事最難明石火光陰易竟何日辭家學道隨時且自觀心從前檢點古來人百世滔滔一瞬

若道乾坤終有盡

須彌香水也無奇

續彈詞終

跋

國家以八股取士士人俯首下帷揣摩時藝無暇古學卽志古者取其能通應制爲掇取功名計耳人物事功概未之及况勝國遺踪雖有傳書與時文尤不相關故學者視之若暑裘冬葛置之高閣偶或談及未有不茫然笑爲迂者吾表兄質翁先生偶取明代事畧踵楊子彈詞而續編之使人一彈再鼓吟咏謳歌燎如指掌文而不腐人人易曉淺而不俚處處能通褒貶不隨乎俗見是非悉協夫天真不僅有關風雅實能扶植綱常乙丑歲杪愚兄弟乃拉馮子霍門沈子萊山虞賓李子巨公葉子安甫君御湯子



承宣羅子與立文淵陳子廷琰倪子建遠等諸知己各出  
少許助登梨棗俾海內同心覽之庶幾稱快云

從學表弟石廷煥謹跋





